

Փոքրիկ աղջիկը ոչինչ չպատասխանեց եւ իմ վրայ ուշադրութիւն անգամ չդարձրեց, միայն զցելով մօրս մօտ թաշկինակի մէջ կապած մի բան, վազեց դէպի վառարանը եւ սկսեց իր լրջացած ձեռքերը տաքացնել արդէն մարած կրակով: Երբ նկատեց, որ ջերմութիւն չկայ, գնաց մօրս մօտ, եւ գրկելով նրա պարանոցը, կպաւ կուրծքին:

– Չայրս ուղարկեց, – ասաց նա, ցոյց տալով կապոցը:

Յետոյ դարձաւ դէպի ինձ, կարծես նա չէր կարող համբերել, որ իմ կոշտ հարցմունքը թողեց առանց պատասխանի:

– Ես քեզ նման պառաւ տատիկ չեմ, որ կրակի մօտը նստեմ, ու տնից դուրս չգամ:

Մօրս տխուր դեմքի վրայ երեւաց մի անսովոր ժպիտ, նա դրեց Մարոյի սառած ձեռքերը իր ծոցի մէջ, եւ գրկելով նրան, սկսեց տաքացնել: Նրա լեզուն բացոնեցաւ:

– Չարսի՛, – ասաց նա մօրս մի առանձին ուրախութեամբ, – այնքան ձիւն է եկել, այնքան ձիւն է եկել, ուղիղ մի արշին, – տես այսքան (նա ձեռքով չափեց իր ոտքից մինչեւ գլուխը): – Ֆարհատ, – դարձաւ նա դէպի ինձ, – առաւօտեան ձնագնդի կը խաղանք, այնպէս չէ՞: Ու՛ր է Մարիամը, – խօսքը փոխեց նա, – թո՛ղ լուսանայ, ես նրա աչքը կհանեմ... Մագթաղին ձիւնով չեմ խփի, նա լաւ աղջիկ է: Բայց այդ սատկած Մարիամը, բերնումը ինչ որ գալիս է, դուրս է տալիս... Թո՛ղ լուսանա...

– Ես ինքս կը ծեծեմ Մարիամին, կը պատոհիրեմ, որ քեզ վատ բան չասէ, – հանգստացնում էր նրան մայրս:

– Լեզուն կտրե՛ր, որ սուս կենայ:

– Կը կտրեմ... – պատասխանեց մայրս ժպտալով:

Մարօն տեսնելով, որ պատիժը աւելի սաստիկ պետք է լինէր, քան այն վիրաւորանքը, որ Մարիամը հասցրել էր նրան, ետ առեց իր խօսքը:

– Չէ, մի՛ կտրէ, ասա, որ ինձ վատ բան չասի, թէ չէ ծամերը մէկ-մէկ կփետրեմ...

Մայրս սեղմեց նրան իր կուրծքին եւ համբուրեց:

– Չարսի, – առաջ տարաւ շատախօս Մարօն, – ի՛նչ լաւ է ձիւնը... վազում ես, վազում, չես կշտանում... ընկնում ես, այնքան փափուկ է, որ կողքդ չէ ցաւում... – Չարսի, ե՛րբ կը սառչի մեր լիճը:

Մարոյի վերջին հարցմունքը մեր տան մօտ գտնուած փոքրիկ լճակի մասին էր, որը ձմեռը սառչելով, մեծ զոարճութիւն էր պատճառում խաղա-